

AKASHVANI AIZAWL

REGIONAL NEWS BULLETIN

HEADLINES (MORNING)

1. Tukin dar 7 atang khan Aizawl Municipal Corporation (AMC) inthlan chu boruak muanawm tak hnuai ah vote thlak tan a ni.
2. AMC Corporator vawiina thlan turah Party hotuten an Candidate thehchhuah chu an tha tawk tih sawiin tlin ngei an beisei thu an sawi.
3. West Bengal Assembly inthlan thawkhathna leh Tamil Nadu Assembly inthlan campaign chu vawiin hian a tawp dawn a. Ningani ah vote thlak a ni ang
4. India leh South Korea chuan kum 2030 ah chuan sumdawntawwna dollar tluklehdingawn 50 a tihlen an remti

<><><>

AMC POLLS

Tukin dar 7 atang khan Aizawl Municipal Corporation (AMC) inthlan chu boruak muanawm tak hnuai ah vote thlak tan a ni.

AMC inthlanna ah ward 19 awmin, polling station 264 a awm a, vote thlak theih hun chhung hi zing dar 7 atanga tanin tlai dar 5 thleng hawn a ni ang.

AMC inthlanna tura vote nei awm zat chu hmeichhia nuai 1, sing 2, sang 9 leh 656 leh mipa nuai 1, sing 1 leh 333 an ni a, an vawin vote nei hi mi nuai 2, sing 3, sang 9 leh 989 an awm a, mipa ai hmeichhia an tamna chu 19,323 a ni. Vote awm tamna ber chu ward 18-na niin, vote 18,906 an awm a. A tlemna ber ward 8-na-ah vote nei mi 7,975 an awm thung. AMC huam chhungah hian hian a veng bil ang a vote tamna ber chu ward number 2-na huam chhunga Bawngkawn Veng a ni a, vote 6,442 an awm a ni.

AMC inthlan ah hian rorel lai ZPM, bakah MNF leh MPCC te chuan bial/ward 19 an chuh kim vek a. BJP chuan bial 11-ah candidate an nei a. Independent candidate an awm lo. AMC bial/ward 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm a, ZPM leh MPCC hmeichhe candidate 3-te'n tu pawhina chuh theih bial an chuh a, MNF hmeichhe candidate pakhatin a chuh baw. Tun tum AMC inthlan chuhtu mi 68 zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

Tun tum hi AMC inthlan buatsaih vawi 4-na tur a ni a, AMC hnuai ah hian Ward 19 awmin, heta tanga Ward 6(paruk) hi hmeichhe tana reserved a ni a, Local council 89 leh Polling Station 264 a awm mek a ni.

Akashvani Regional News Unit chuan AMC Inthlan ni hian chanchinthar chhiar hun pangngai zing dar 7 leh chanve chawhnu dar 2 leh a chanve leh tlai lam dar 6 leh a chanve bakah Inthlan chungchang thuthar a puang dawn a, zing dar 9, chhun dar 11 leh chawhnu dar 1 ah te minute 5 chanchinthar ngaihthlak tur a awm dawn a ni.

(Desk)

<><><>

HOME MINISTER

Home Minister Pu K. Sapdanga'n State-a ZPM Sawrkar kal mek chu mipuiten tha an la ti tawk tih sawiin AMC ah sawrkarna an chan ngei a beisei thu a sawi.

Akashvani palai Isaac Zoramsanga nen an inkawmna ah he thu hi sawiin Pu K. Sapdanga chuan ZPM Sawrkar kal lai mek chu mipuiten an pawm ber ala ni tih sawiin an hnathawh hrang hrang chu mipuiten tha an tih thu a sawi a, Aizawl khawpuia inkalpawhna kawng, kawlpheha leh tui mumal tha tak avangin mipuiten ZPM lam an hawi a ti a, Aizawl Municipal Corporation-a MNF sawrkar tum 2 ding tawh chu mipuiten thlak hun antih tawh avangin ZPM sawrkar siam theihna chance a sang hle tih a sawi.

ZPM Adviser Pu K. Sapdanga chuan Aizawl mipuiin AMC sawrkarah beiseina an nei sang tih sawiin ZPM chuan Aizawl khawpui siam tha turin candidate an thlang uluk tih sawiin taima takin an campaign a ti a, Ward tinah an thawkrim tih sawiin hlawhtlinna an chan ngei a ring tih a sawi.

Pu K. Sapdanga chuan survey uluk takin an ti tih sawiin seat tam tham tak lak an inbeisei a ti a, seat 15 chuang lak an inbeisei thu a sawi.

Byte : Pu K. Sapdanga

(Desk)

<><><>

MNF PRESIDENT

MNF President Pu Zoramthanga'n AMC inthlana an party aiawh tur te chu an tha tawh tih sawiin MNF Candidate that ber tum anih thu a sawi.

Akashvani palai nena an inkawmna ah he thu hi sawiin Pu Zoramthanga chuan AMC inthlanah an Party candidate te an ring tawh tih sawiin inthlan dang nena tehkhinin MNF Candidate neih that ber tum ani a ti a, beiseina sang tak an neih thu a sawi.

Pu Zoramthanga chuan an elpui lian ber chu ZPM anni tih sawiin Congress chuan seat tam an lak a rin loh thu a sawi a, Ward hrang hrangah ZPM nena inbei ber tur annih thu a sawi a ni.

MNF President chuan ZPM sawrkara mipui beiseina chu nasa takin a thlachhia tih sawiin hetih lai hian MNF erawh chu dingchhuak leh turin hma an sawn zel a ti a, an phur bakah an inlungual thu a sawi a ni.

Byte : MNF President

(Desk)

<><><>

MPCC PRESIDENT

MPCC President Pu Lal Thanzara'n Aizawl Municipal inthlan chuh tura candidate zingah Congress candidate te chu mimal thlira tha ber anni tih a sawi.

Akashvani palai Isaac Zoramsanga nen an inkawmna ah he thu hi sawiin Pu Lal Thanzara chuan Candidate hrang hrang zingah Congress candidate chu party anga thlir loh chuan Ward chhunga tha ber te an ni hlawm vek a ti a, khawtlanga mi chhuanawm tak tak anni tih sawiin Candidate an neih that ber thu a sawi a ni.

MPCC President chuan Congress party chu tum dang aiin an tang tih sawiin Party hotu atang Unit thlengin inlungual takin hna an thawh a ti a, hma an sawn nasa hle tih sawiin seat tam tham tak lak an inbeisei thu a sawi.

Pu Lal Thanzara chuan an khingpui lian ber chu ZPM anni tih sawiin MNF nen chuan intiat tawh velah an inngai a ti a, ZPM chu state ah rorel lai party an nih avangin candidate an tling tam thei a ti a, Congress chu AMC ah sawrkarna siam zo lovin awm mahse an party chuan san lam an pan zel tho tih sawiin dinchhuah hun an la nei ngei dawn a ti a, State sawrkar ZPM kaihhruai leh AMC-a sawrkar MNF Party te chu mipui tana hna an thawh that tawh loh avangin Congress candidate te tan kawng nasa takin a inhawng tih a sawi.

Congress President chuan Congress party chu an inlungual tih sawiin mi sawi thin amah leh Pu Zodintluanga pawh inngeih takin an campaign tlang a ti a, chhungrilah buaina an neilo tih sawiin kawng hrang hrangah party chu an inlungual thu a sawi a ni.

Byte of Pu Lal Thanzara

(Desk)

<><><>

BJP PRESIDENT

BJP President Dr K Beichhua an Mizoramah BJP Party in hma a sawn zel tih sawiin thalaiten a BJP hlutna an hre chho mek tih a sawi.

Akashvani palai nen an inkawmna ah he thu hi sawiin Dr K. Beichhua chuan State pum thlirin BJP Party chuan hma a sawn zel tih sawiin thalaiten an bawh chho zel a ti a, tual to party ringawta inngah that loh zia mipuiin an hre chho mek tih sawiin National Party lian duh tu an tam chho zel a ti a, BJP ah hmasawmna lian zawk a awm thei tih chu mipuite pawm dan ani chho zel tih sawiin kawng hrang hrangah party in hma an sawn thu a sawi a ni.

BJP President chuan AMC beiseina an nei sanglo tih sawiin sawrkar tha tak erawh a pian ngei a beisei a ti a, BJP chu hmasawn zel mahse Aizawl mipuite an an la tlak nat tawh loh avangin AMC inthlanah an beiseina a sang lutuk lo tih a sawi.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CAMPAIGN

West Bengal Assembly inthlan thawhkhatah leh Tamil Nadu Assembly inthlan campaign chu vawiin hian a tawp dawn a. Ningani ah vote thlak a ni ang.

West Bengal ah chuan inthlan thawhkhatah Assembly bial 152 ah vote thlak a ni dawn a. Tamil Nadu-ah chaun assembly bial 234 ah vote thlak a ni ang. Campaign hun tawpah hian Party hrang hrang hruaitute hian vote zawngin theihtawp an chhuah a. BJP President Nitin Nabin, Rajnath Singh, JP Nadda leh UP Chief Minister Yogi Adityanath ten West Bengal hmun hrang hrangah hun an hmang a. Congress hruaitu Rahul Gandhi, Congress President Mallikarjun Kharge, Telangana Minister Mohammad Azharuddin te pawh West Bengalah an campaign bawh a. TMC hruaitu leh West Bengal CM Mamata Banerjee chu North 24 Parganas ah vantlang inkhawm a nei bawh a ni.

Tamil Nadu ah pawh star campaigner 900 chuangin hmun hrang hrangah campaign hna an thawk a. Aam Aadmi Party hotupa Arvind Kejriwal pawh nimin tlai khan Chennai ah a campaign a ni.

.(Newsonair)

<><><>

SOUTH KOREA & INDIA MOU

India leh South Korea chuan kum 2030 ah chuan sumdawntawwna dollar tluklehdingawn 50 a tihlen an remti. Ram pahnihte hian nimin khan thawhdunna tur inremna thuthlung pali an ziak a. Sports, Culutral and Creative Industries, Small and Medium Enterprises leh Industrial Cooperation Committee dinna turahte MoU hi ziah a ni a. Comprehensive Economic Partnership Agreement leh India-Korea Digital Bridge tichangtlun tura inbiakna chhunzawm zel an remti bawh a ni.

Heng inremna hi Prime Minister Narendra Modia leh South Korea President Lee Jae Myung te New Delhi-ah an inkawm hnuaah an ziak a. Hruaitu pahnihten chanchinbumite an kawmnaah Pu Modia chuan mipui rorelna, eibar zawwna kawnga dikna leh dan rorelna chu ram pahnih zunzama a bet tlat a ti a. Indo-pacific thilthleng chungchangah pawh ngaihda inang an neih thu a sawi a. Kum 10 kalta chhungin ram pahnih inlaichinna chu a thang nasa hle a ti a. President Lee alo zin avangin ram pahnih hmalam huna thawhdunna tur tam tak a pian belh ang a ti bawh.

(Newsonair)

<><><>